

Mbanj gou heuhguh Mbanj-ndoengcoengz. Henz mbanj gou miz aen ndoi he, aen ndoi neix gaxgonq miz haujlai faexcoengz, gou cai dwg aenvih aen ndoi neix miz faexcoengz lai, mbanj gou cij heuhguh Mbanjndoengcoengz.

Mbanj gou gig gyawj gwnz haw, gvaq ndoengcoengz bae couh daengz haw lo.

Ndoengcoengz mbouj sang youh mbouj hung, bouxlaux byaij geij faen cung couh gvaq ndaej ndoi bae. Hoeng gou seiziq cungj roxnynh aen ndoi neix youh sang youh hung.

40 geij bi gaxgonq, gou youq mbanjranz doeg siujyoz. Seizhaenx fatseng gvaq song gienh saeh caeuq ndoengcoengz mizgven, song gienh saeh neix gou baenz seiqvunz siengj lumz cungj lumz mbouj ndaej.

Gienh saeh daih’it dwg gou byaij gvaq ndoengcoengz lau fangz lai. Seizhaenx, vunzmbanj laux dai bingh dai le cungj ram bae ndoengcoengz moek, byaij gvaq ndoengcoengz aeu ginggvaq henz haujlai aen moh. Youq nienzdaih haenx caengz miz densi, cijmiz denyingj, yawj denyingj aeu bae daengz gunghse (seizneix heuhguh yangh) cij miz, lwgnyez bi daengz byai ndaej yawj song sam ciengz denyingj couh riu myaiz doek lo.

Bang lwgnyez dou cungj maij yawj denyingj, haemhlawz gunghse cuengq denyingj dou cungj aeu bae yawj. Bae yawj denyingj couh aeu byaij gvaq ndoengcoengz, baezlawz byaij gvaq ndoengcoengz dou cungj lau yaek dai, dingq bouxlaux gangigoj naeuz gizlawz miz moh lai, gizhaenx couh miz fangz. Lwgnyez cungj lau fangz, lau fangz youh siengj bae yawj denyingj, baenzlawz guh ne?

Gou siengj ok aen banhfap daeuj, aeu gyoengq doengzdohi yienghneix gvaq ndoengcoengz: Caezgya ndwn baenz baiz, mbaq nem mbaq, fwngz gaem fwngz, yienghneix ndwn baenz baiz le, caiq lumj gaijfangginh heuh “yij wz yij” doengzbouh byaij, bouxlawz cungj mbouj ndaej byaij gonq, hix mbouj hawj bouxlawz doeklaeng, yienghneix couhsuenq miz fangz okdaeuj hix mbouj rox gaeb bouxlawz ndei lo.

Caezgya yienghneix gangj ndei lo, hoeng yaek daengz ndoengcoengz, gyoengq doengzdohi youh mbouj hawj gou haeuj doih bae, aeu gou gag gaen baihlaeng.

Vihmaz yienghneix ne? Aenvih gyoengqde naeuz gou dwg lwglan dicuj, lwglan dicuj mingh cienh deng fangz gaeb bae suenq lo.



Dicuj dwg vunz maz? Lwglan dicuj vihmaz mingh cienh? Daengz laeng gou cij lwnh mwngz dingq.

Yienghneix gyoengqde fwngz gaem maenh fwngz, guh baenz baiz byaij gonq, gou deng gaen baihlaeng, lumjnaeuz miz duzfanz homh daengz gumq gou lo, hoeng gou youh mbouj gamj buet bae gonq. Caezgya byaij daengz ndoengcoengz le, mbouj rox dwg duz lawz heuh sing ndeu “meh ha, fangz homh daeuj lo”, sikhaek couh miz vunz lot fwngz okdaeuj gag buet bae gonq, seizneix gyoengqde bouxboux cungj gag deuzmingh, bouxboux cungj buet ndaej mingh cungj mbouj aeu, miz saek boux buet vaiq lai deng laemx daengz gyaeujhoq naeng lot bae, lij miz saek boux buet daengz nyohu conh cungj mbouj rox, daengz seiz yawj denyingj le haeugyaq lai deng vunz gangj le cij rox swheij nyohu dumz vaqdinj lo……

Gienh saeh daihngaih dwg gou byaij gvaq ndoengcoengz lau vunz lai. Seizhaenx ranz gou dwg ranz dicuj, gou dwg lwglan dicuj. Dicuj dwg vunz maz? Bouxcoz seizneix cungj mbouj rox lo. Hoeng youq seizdaih haenx, dicuj couhwdw vunzvaih vunzcienh, bouxlawz dwg dicuj couh aeu deng vunz haep deng vunz dub, lwglan dicuj cungj deng vunz gvaek gyaeuj. Seizhaenx gou ngamq doeg siujyoz, doengxngoenz hwnjhag aeu byaij gvaq ndoengcoengz, byaij gvaq ndoengcoengz gingciengz bungz daengz gyoengq doengzhag ndaw mbanj. Aenvih gou dwg lwglan dicuj, gyoengqde dwg lwglan binzya cunghnangz, gyoengqde couh aeu gvaek gyaeuj gou, itmienh gvaek lij itmienh heuh “gvaek dai lwglan dicuj bae, gvaek dai de dangq dwg duzma dai!” Miz saekseiz gvaek gyaeuj gou gvaek daengz lwgfwnz manh le, saek boux lij ndaq naeuz “meh mwngz gai maih! Aen gyaeuj lwglan dicuj geng lai ha, gip aen rinhat daeuj dub de, yawj gyaeuj de geng gvaq rinhat lwi!” Gizsaed, gyaeuj gou di ndeu cungj

mbouj geng, gou deng gyoengqde gvaek lai le, gingciengz gyaeuj foeg gyaeuj ngunh, deng gvaek in lai gou couh itmienh daej itmienh deuz dauqma, gyoengqde cungj homh gaenlaeng…… Caj daengz gyoengqde bae hagdangz le, gou cij laeglemx caiq bae hagdangz, hoeng siengj mbouj daengz gyoengqde lij ndoj youq ndoengcoengz, gou youh deng gyoengqde gvaek gyaeuj, gyoengqde gvaek daengz lwgfwnz cungj in bae, gou deng gvaek gyaeuj in lai youh daejnga’nga…… Seizhaenx, gou gingciengz you gvaq ngoenz, ngoenzngoenz deng gvaek gyaeuj, aeu gvaek daengz seizlawz cij liux? Gou boux lwgnyez iqiq vihmaz mingh hoj baenz yienghneix? Gou byaij gvaq ndoengcoengz bae doegsaw couh lumj byaij hwnj mbwn yienghhaenx nanz ha……

Gij saeh neix gvaqbae geijcib bi lo, daengz seizneix gou miz saekhaemh fangzhwnzloq aen gyaeuj lij dumz hanh liux. Caeklaiq doeklaeng gou gaen bohmeb bae lingh aen yienh gvaq saedceij, mboujnex caen gangj mbouj dingh ngoenzlawz deng bang lwg haenx gvaek huk gvaek dai bae.

Daengz gizwnq le gou caiq mbouj deng vunz gvaek lo, gou gaen bohmeb bae aen mbanj haenx dwg mbanj Yauzcuz, gyoengq lwgnyez Bouxyauz cungj caeuq gou guhdohi guhcaemz, cungj mbouj miz lwg lawz gvaek vunz. Gou lwnh gyoengq doengzdohi naeuz seizgonq youq ndaw mbanj baenzlawz deng gvaek, hoeng gou gangj bae gangj dauq gyoengqde cungj dingq mbouj rox. Gijmaz heuhguh “gvaek” ne? Sawgun ndawde mbouj miz aen cih neix, aeu Vahyauz youh gangj mbouj cingcuj. Doeklaeng, gou son gyoengqde aeu lwgfwnz gvaek swheij gyoengqde cij heuh naeuz: “Meh ha, deng gvaek baenzneix in ha! Vunz sou baenzlawz roengz ndaej fwngz nw? Dou Bouxyauz mbouj miz aen cih ‘gvaek’, dou cungj mbouj miz vunz gvaek lwgnyez. Danghnaeuz miz duz lawz gvaek lwgnyez, de mbouj dwg

fatbag couhwdw ra dai, vunzmbanj mbouj dub dai de cij gvaiq lo.”

Bineix cingmingz, gou ma ranzmbanj guh cingmingz. Seizneix, ndoengcoengz bienq yiengh seuq lo: Gaxgonq gou lij iq roxnynh ndoengcoengz youh hung youh sang, seizneix gou baenz bouxlaux le yawj ndoengcoengz youh iq youh daemq. Gaxgonq ndoengcoengz dauqcawq moek miz moh, seizneix dauqcawq hwnq ranz moq, moh cungj mbouj raen lo. Banhaemh dauqcawq dienhdaeng ronghsag, lwgnyez gvaq ndoeng neix lij miz maz fangz lau dem? Gaxgonq gwnz ndoi dauqcawq miz faexcoengz, seizneix ra go faexcoengz lumj goekga lwgnyez hung cungj nanz.

Ngoenzhaenx, gou bungz raen boux seiziq gvaek gou ceiq doeg haenx. De raen gou le yienghneix gangj: “Sou okbae ra ndaej gwn lo. Danghnaeuz sou hix youq ndaw mbanj, haengjdingh lumj gou yienghneix ranz lak mbouj miz cienz coih, ndang baenzbingh mbouj miz cienz yw.”

Gou gik caeuq de gangj lai, hoeng ndawsim gou gag mingzbej: Seizgonq goeng gou gaenx guh hong ra ndaej gwn, couh deng veh guh dicuj, goeng de gik dai ranz de hoj lai couhwdw binzya cunghnungz.

Seizneix ranz gou youh beij ranz de gvaq ndaej ndei, hoeng seizneix ranz gou gaenq mbouj dwg ranz dicuj, ranz de hix mbouj dwg ranz binzya cunghnungz lo. Seizneix danghnaeuz lwg de youh daeuj gvaek gyaeuj lwg gou, gou haengjdingh mbouj lumj gaxgonq unqnyieg lo, couhsuenq mbouj aeu fagfouj daeuj bag gyaeuj lwg de guh song buenq bae, hix miz banhfap hawj de ak mbouj ndaej. Aenvih lwgnyez 3 bi cungj rox, seizneix dwg seizdaih gangj fapldw, bouxlawz luenh gvaek vunz, cijaeu daj dienhvah bauqgingj, gingjcaz couh daeuj guenq lo.

Seizdaih gvaek gyaeuj lwglan dicuj haenx, caen gvaqbae lo.

Duzmou Vih Gijmaz Ngaiz Gaj Ne?

猪为何被杀呢？

□ Hausij

Riuznaeuz gaxgonq vuengzdae qwnzmbwn raen duzmou ukgyaeuj lingz, couh baij de bae cae reihnaz. Duzmou naemj: Cae reihnaz lek ndit lek fwn, sinhoj lai. Ndigah de bae gouz vuenh hong. Vuengzdae qwnzmbwn couh hawj de bae rag ci, hawj duzvaiz bae cae reihnaz.

Duzmou naemj: Rag ci ngoenznaengz baedauq, beij cae reihnaz lij baeg. De bae gouz vuenh hong. Vuengzdae qwnzmbwn hawj de hen ranz, hawj duzmax bae rag ci.

Duzmou naemj: Hen ranz yienznaeuz mbouj deng ndit dak fwn rwed, hoeng ngoenz daengz hwnz

cungj aeu hen, lij mbouj ndaej ninz. De ngeix bae ngeix dauq, vanzlij bae gouz vuenh hong.

Vuengzdae qwnzmbwn cam: “Mwngz naemj guh hong maz ne?” De dap: “Guh maz cungj ndaej, hoeng aeu ndaej gwn gaeuq ninz gaeuq.” Baenzneix, vuengzdae qwnzmbwn mbouj hawj de guh hong, hawj duzma bae hen ranz.

Daj seizde hwnj, duzmou gwn le ninz, ninz hwnq gwn, lix ndaej angqyangz. De naemj: Ngoenzneix gvaq ndaej baenzneix cwxcaih, caeklaiq swheij coengmingz.

De baenzlawz rox vuengzdae qwnzmbwn caeuq gyoengqvunz gangj, duzmou mbouj guh hong, caj de majhung couh gaj de gwn noh. Duzmou dai youq ndaengndieng caeuq gik lai.